

ULLOQ 10.11.22

UKA2022/27

**Utoqqaat pillugit isumalioqatigiissitamik utoqqarnut suliassaqarfimmi suliaqartunik peqataaffigineqartumik pilersitsinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Naalakkersuisut utoqqaat pillugit isumalioqatigiissitap kaammattuutai tunngavigalugit utoqqaat pillugit inatsisissatut siunnersuummik UKA2024-mi saqqummiussissapput.**

(Inatsisartunut ilaasortaq, Mariane Paviasen, Inuit Ataqtigiit)

Siunnersuuteqartup Marianne Paviasenip siunnersuutaanut Siumumit ima oqaaseqassaagut.

Siunnersuuteqartup tunngaviusumik ujartugaa, tassalu ataatsimut utoqqarnut inatsiseqalernissaq, Siumumit paasilluarparput. Siunnersuuteqartup nammineq oqaasertaliinermini tikippaa, ukiorpassuarni utoqqaat qineqqusaarutigineqartartut, taamaattoq aaqqiissutissat tigussaasut naammassineqartarnerat amigaataasartoq.

Tamannarpiaq Siumumit eqqumaffigalugu suligatta oqaatigissavara. Siumut isumaqarpoq, ukiut ingerlanerini suliassat utoqqarnut tunngasuteqartut uninngateqqinneqarsinnaanngitsut, qinigaaffimilu uani suliaralugit naammassineqartariaqartut.

Siumut isumaqarpoq, utoqqarnut ataatsimut inatsisiliornikkut, pisinnaatitaaffiit pisussaaffiillu erseqqissumik ujaruminartumillu inissinneqarsinnaasut. Assersuutigalugu utoqqalinersiat, ineqarnermut tapit allallu utoqqarnut – imaappoq inummut namminermt - tunngassuteqartut ataatsimoortinnerullugit pisortat sullissinerannut tunngatillugu malittarisassaliunneqarsinnaapput.



Naalackersuisut akissuteqaatiminni tikkuarpaat, ataatsimut utoqqarnut inatsisiliorneq kisimiitsillugu tamanik aaqqiissuteqarnavianngitsoq. Tassami ikiorneqarnissamut periarfissat assigisaallu inatsisinik allanik tunngaveqarput, assersuutigalugu sulisut atugaat.

Akissuteqaatiminni Naalackersuisut ilanngullugu nassuiarpaat, kommunit suleqatigalugit utoqqarnut inatsisissamik piareersateqarneq aallartinneqareersimasoq, pilersaarutigineqartorlu 2024-mi upernaakkut siunnersuut Inatsisartunut saqqummiunneqassasoq.

Siumumit tamanna paasillutigu Naalackersuisut alannguutissatut siunnersuutaat akuersaarparput.

Taamak oqareerluta erseqqissaassutigissavarput, inatsisissatut suliaq kommunit, Utoqqaat Illersuisuat atuisullu peqataatilluinnarlugit suliarineqassasoq Siumup kissaatigimmagu. Naalackersuisummi akissutaanni kommunit **sapinngisamik** annertunerpaamik peqataatinneqarnissaat oqariartuutigineqarpoq.

Kommunit ulluinnarni pineqartunut suliaqartuupput, taakkulu qitiutillugit suliaq una ingerlanneqassasoq Siumup kissaatigigamiuk naqissuseqqissavaa.

Qujanaq.

Dines Mikaelson, Siumut